

清
·
史
稿

卷一

卷二

卷三

清史稿

列傳一百六十

宗室奕山

隆文

宗室奕經

文蔚
余步雲

特依順

宗室奕山恂郡王允禩四世孫隸鑲藍旗授乾清門侍衛道光七年從征喀什噶爾擢頭等侍衛御前行走歷伊犁領隊大臣參贊大臣十八年授伊犁將軍二十年偕副都統關保赴塔什圖畢治墾務闢田十六萬四千餘畝奏請置回千戶及五品伯克以下官召授正白旗領侍衛內大臣御前大臣二十一年命爲靖逆將軍督師廣東尙書隆文提督楊芳爲參贊副之時英兵已陷虎門楊芳先至聽美利堅人居間乞許通商被嚴斥促奕山速赴軍三月抵廣州英艦橫亘省河奕山問計於林則徐則徐議先遣洋商設法羈縻俾英艦暫退塞河道積沙囊於岸以禦礮然後以守爲攻奕山不能用且自琦善撤防舊儲木椿鉅石皆爲敵移去時以杉板小船游弋以誘我師楊芳主持重以募勇未集不欲浪戰奕出初亦然之旣而惑於左右言欲僥倖一試芳止之不可夜進兵乘風燬七艘報捷詰旦乃知誤焚民舟而英兵大至連舟抵城下禦於河南互有

殺傷遂閉城敵以輪船襲泥城副將岱昌等聞礮先遁燬師船六十有奇城外東西礮臺並陷英兵進踞後山四方礮臺奕山居貢院礮火及焉軍民惶懼乃遣廣州知府余保純出城見義律議息兵義律索烟價千二百萬美商居間減其半並許給香港全島英兵乃退奕山偕隆文先退屯距城六十里小金山諱敗爲勝疏言義律窮蹙乞撫照舊通商改償費爲追交商欠由粵海關及藩運兩庫給之宣宗覽奏以夷情恭順詔允所請閩浙總督顏伯燾迭疏劾其欺罔下廣西巡撫梁章鉅察奏乃得其狀報聞英人既得賂於粵移兵犯閩浙奕山等始收回大黃滄獵德虎門諸礮臺填塞省河鄉民於義律未退時困之三元里余保純趨救始得出於是團練日盛中外皆言粵民可用遂撤客軍改募練勇迭詔趣奕山等規復香港實不能戰惟屢疏陳颶風漂沒敵船毀香港蓬寮藉修礮臺未竣造船未就爲詞以塞嚴詔二十二年英人撤義律回國以濮鼎查代之大舉犯浙江江蘇詔斥奕山陳奏欺詐嚴議褫御前大臣領侍衛內大臣左都御史仍留漢軍都統任及和議定追論援粵失機褫職治罪論大辟圈

禁宗人府空室二十三年釋之予二等侍衛充和闐辦事大臣調伊犁參贊大臣署將軍二十七年調葉爾羌參贊大臣安集延布魯特回匪入邊圍喀什噶爾英吉沙爾命陝甘總督布彥泰督師討之奕山爲副連破賊於科科熱依瓦特瓦及蘇噶特布拉克賊遁走論功封二等鎮國將軍賜雙眼花翎尋授內閣學士調伊犁參贊大臣兼鑲黃旗蒙古都統二十九年授伊犁將軍俄羅斯遣使至伊犁請於伊犁塔爾巴哈台喀什噶爾三處通商詔允其二惟喀什噶爾不許咸豐元年俄人復固請仍拒之偕參贊布彥泰與定伊塔通商章程十七條祭酒勝保疏論當仿恰克圖通商舊例限以時日人數奕山議撫馭外夷以信爲主旣已議定章程旋改必有藉口如所請行累授內大臣御前大臣仍留將軍任五年調黑龍江將軍時俄羅斯以分界爲名欲得黑龍江松花江左岸地遣艦入精奇里江建屋於霍爾托庫圖勒密布雅里奕山疏陳陽撫陰防之策七年俄使請入京拒不許八年俄人偕英法美三國合兵犯天津三國窺商利而俄志在邊地於是俄使木里斐岳幅至愛琿堅請畫界奕山允自額爾古

納河口循黑龍江至松花江左岸之地盡屬之俄俄使知奕山昧於地勢駐兵黑龍江口復索綏芬河烏蘇里江地奕山懼其兵威勿能抗疏稱未許然已告俄使可比照海口等處辦理踰年與俄使會於愛琿定約三條鑲滿蒙漢三體字爲界碑大理寺少卿殷兆鏞劾奕山以邊地五千餘里藉稱閒曠不候諭旨拱手授人始既輕諾繼復受人所制無能轉圜詔切責之革職留任又以縱俄艦往黑龍江不之阻褫御前大臣召回京十一年聯軍在京定約因奕山前議自烏蘇里江口而南踰興凱湖至綏芬河瑚布圖河口復沿琿春河達圖們江口以東盡與俄人語具邦交志尋復御前大臣補正紅旗蒙古都統同治中封一等鎮國將軍授內大臣以疾罷光緒四年卒諡莊簡子載鷺理藩院侍郎載鷺子溥瀚鑲黃旗蒙古副都統孫毓熙一等奉國將軍隆文伊爾根覺羅氏滿洲正紅旗人嘉慶十三年進士選庶吉士散館改刑部主事坐事罷職捐復授翰林院侍講累擢內閣學士道光中充駐藏大臣厯吏部戶部侍郎左都御史刑部兵部尙書軍機大臣屢奉使出讞獄偕奕山督師廣東意不相合甫至病

憂憤而卒諡端毅

宗室奕經成親王永理孫貝勒綿懿子承繼循郡王允璋後隸鑲紅旗授乾清門侍衛歷奉宸院卿內閣學士兼副都統護軍統領道光三年坐失察惇親王肩輿擅入神武中門褫兼職留內閣學士任五年遷兵部侍郎十年從征喀什噶爾回匪事平回京歷吏部戶部侍郎十四年出爲黑龍江將軍十六年召授吏部尙書兼步軍統領二十一年協辦大學士英兵犯浙江定海鎮海及甯波府城相繼陷裕謙死事命爲揚威將軍督師往勦都統哈喇阿提督胡超爲參贊尋易侍郎文蔚都統特依順副之陞辭日宣宗御勤政殿訓示方略特詔申明軍紀凡失守各城逃將逃兵軍法從事發交內庫花翎等件有功者立予懋賞勉以恩威並用整飭戎行大學士穆彰阿奏請釋琦善出獄隨赴軍前効力奕經卻之奕經分屬懿親素謹厚爲上所倚重奉命專征頗欲有爲而不更事尤昧兵略奏調陝甘川黔兵一萬人請撥部餉一萬兩倉猝未集駐蘇州以待上以諸將少可恃者命凡文武員弁及士民商賈有奇材異能一藝可取者許

詣軍前投効奕經渡江後於營門設木甌納名即延見且許密陳得失於是獻策者四百餘人投効者一百四十餘人而軍中所辟僚佐多闕冗京員投効者亦無異才惟宿遷舉人臧紆青自負氣節爲言議撫徒損國威始決主戰又勸劾斬失律提督余步雲以立威望疏具而旋寢以浙兵屢潰不堪臨陣召募山東河南安徽義勇浙事日亟巡撫劉韻珂促援遲不至遂相惡久駐江蘇以供應之累官吏亦厭之餉需文報皆延擱不時應十二月始抵杭州前泗州知州張應雲獻策規復甯波奕經文蔚皆然之遂令總理前敵營務應雲以重資購甯波府吏陸心蘭爲內應日報機密多虛誑奕經禱於西湖關廟占得虎頭之兆乃議於二十二年正月寅日寅時進兵屢遣諜爲敵所獲漏師期初英兵踞府城僅二三百人艦泊定海至是濮鼎查率十九艘兵二千散泊江岸早爲之備矣奕經由紹興進曹娥江而慈谿敵兵退應雲請急進遂駐慈谿東關文蔚分屯長谿嶺令提督段永福余步雲等趨甯波游擊劉天保趨鎮海副將朱貴駐大寶山而應雲率所募義勇駐駱駝橋爲諸軍策應約於正月晦數路並舉

而敵已勾結應雲部勇勢且生變不及待期先二日輕軍分襲不携槍礮永福等入甯波南門中地雷天保甫及鎮海城下爲敵礮擊退皆大敗越日應雲所具火攻船爲敵所焚軍中自驚奔大寶山朱貴收集潰兵圖進攻敵兵已至力戰竟日殺傷相當無援貴死之文蔚聞敗亦退軍資器械棄失殆盡奕經留軍紹興回駐杭州自請嚴議詔原之英艦乘勝由海窺錢塘江以尖山海口淺阻尋退去鄭鼎臣者殉難總兵國鴻子曾從父軍奕經予二十四萬金令募水勇規復定海聞甯鎮之敗遂巡海上奕經督之嚴乃報三月三日敗敵於定海十六門洋面燬船數十殲斃數百劉韻珂以爲欺罔奕經遣侍衛容照等出洋查勘得焚燬船木及壞械回報乃疏聞賜奕經雙眼花翎鼎臣亦被獎時甯波英兵忽退留艦招寶山海口改犯乍浦陷之奕經不能赴援而以收復甯波奏詔斥不先事預防革職留任旣而英兵犯江南陷鎮江逼江甯命奕經赴援尋命駐王江涇防禦奕經自甯波慈谿之敗軍心渙散不能復用益爲劉韻珂所擲掄議守議撫一不使聞及和議成撤師詔布奕經等勞師糜餉誤國殃民罪狀

逮京論大辟圈禁踰年與琦善同起用予四等侍衛充葉爾羌幫辦大臣爲御史陳慶鏞論劾仍褫職未幾復予二等侍衛充葉爾羌參贊大臣調伊犁領隊大臣坐審鞫英吉沙爾領隊大臣齋清額誣捕良回獄不當褫職發黑龍江三十年釋回咸豐初歷伊犁英吉沙爾領隊大臣二年召授工部侍郎調刑部兼副都統三年命率密雲駐防赴山東防粵匪卒於徐州軍次依侍郎例賜卹文蔚費莫氏滿洲正藍旗人嘉慶二年進士授翰林院檢討累擢至兵部工部侍郎兼副都統內務府大臣方其駐長谿嶺也聞諸路軍皆不利欲移營走敵雜難民潰兵猝至焚燬營帳乃奔曹娥江收集潰兵退保紹興欲渡錢塘江爲劉韻珂所阻尋以定海報捷加頭品頂戴軍事竣追論失機褫職下獄踰年釋出予三等侍衛充古城領隊大臣復褫職咸豐初歷喀喇沙爾哈密辦事大臣駐藏大臣奉天府尹五年卒特依順他塔喇氏滿洲正藍旗人福州駐防累遷協領道光十三年從平臺灣張丙亂擢荊州副都統歷騰越鎮總兵密雲副都統甯夏將軍二十一年予都統銜授參贊大臣督師廣東尋命改赴浙江辦理軍

務駐守省城署杭州將軍遂實授乍浦陷坐革職留任和議成命籌辦浙江善後事宜二十六年調烏里雅蘇台將軍二十九年卒余步雲四川廣安人嘉慶中以鄉勇從勦教匪積功至游擊平瞻對叛番累擢重慶鎮總兵道光七年率本鎮兵從楊遇春征回疆破賊洋阿爾巴特莊偕楊芳擊賊於昆拉滿大敗之復和闐追禽賊酋玉努斯授乾清門侍衛擢貴州提督調湖南十二年率貴州兵勦江華猺趙金龍偕提督羅思舉破賊巢金龍就殲加太子少保復破粵猺於永州藍山禽其渠從尙書禧恩赴廣東勦連州猺平之賜雙眼花翎予一等輕車都尉世職歷四川雲南提督復調貴州十八年禽仁懷匪首謝法眞加太子太保調福建提督二十年英兵初陷定海率師赴援調浙江提督二十一年定海既收還步雲駐防鎮海裕謙來督師疏言步雲不可恃未及易而英兵猝至復陷定海三鎮戰歿步雲屯招寶山總兵謝朝恩分守金雞嶺步雲號宿將實巧猾無戰志又曠裕謙剛愎將戰裕謙召與盟神誓師託疾不赴且獻緩敵之策敵攻其前而以小舟載兵由石洞攀援登後山步雲遽棄礮臺走敵乃據

招寶山俯擊鎮海城金雞嶺及縣城先後陷步雲退甯波敵掩至墜馬傷足僅免府城遂陷步雲疏聞委敗於裕謙裕謙既歿其妻赴京訟之二十二年從奕經規復甯波不克禡步雲職逮京命軍機大臣會刑部訊鞫廷臣爭劾其罪亦有原之者獄久延尙書李振祐堅持讞乃定詔曰余步雲膺海疆重寄未陣獲一賊身受一傷首先退縮以致將士效尤奔潰棄城直同兒戲儻不寘之法不惟無以肅軍政而振人心且何以慰死節諸臣於地下步雲遂棄市

論曰奕山奕經天潢貴胄不諳軍旅先後棄師如出一轍事乃益不可爲其人皆庸闇不足責當時廷臣不能預計量吏不能匡救可謂國無人焉奕山後復棄東北邊地其貽患尤深余步雲庸懦巧猾卒膺顯戮宣宗於債事諸人皆從寬典伸軍律者僅步雲一人耳

清史稿

列傳一百六十一

姚文田

戴敦元

朱士彥

何凌漢

李振祐

宗室恩桂

姚文田字秋農浙江歸安人乾隆五十九年高宗幸天津召試第一授內閣中書充軍機章京嘉慶四年一甲一名進士授修撰迭典廣東福建鄉試督廣東河南學政累遷祭酒十八年入直南書房會因林清之變下詔求言文田疏陳略謂堯舜三代之治不越教養兩端爲民正趨向之路知有長上自不干左道之誅爲民廣衣食之源各保身家自不致有爲惡之意近日南方患賦重北方患徭多民困官貧急宜省事久督撫任期則州縣供億少寬州縣例議則人才保全多次年復上疏言上之於下不患其不畏而患其不愛漢文吏治蒸蒸不至於姦愛故也秦顓法律衡石程書一夫夜呼亂者四起畏故也自數年來開上控之端刁民得逞其奸大吏畏其京控遇案親提訐訴不過一人牽涉常至

數十農商廢業中道奔波受胥吏折辱甚至瘐死道斃國家慎刑之意亦曰有
冤抑耳從前馬譚氏一案至今未有正兇無辜致斃者累累是一冤未雪而含
冤者且數十人承審官刑撻橫加以期得實其中冤抑正復不少欲召天和其
可得乎頃者林清構逆搜捕四出至今未已小人意圖見長不能無殃及無辜
奉旨嚴禁仰見皇上如天之仁臣以爲事愈多則擾愈衆莠民易逞機謀良善
惟增苦累應令大小官吏可結速結無多株引庶上下相愛暴亂不作矣至所
謂養民之政不外於農桑本務大江以南地不如中原之廣每歲漕儲正供爲
京畿所仰給者無他人力盡也兗州以北古稱沃衍河南一省皆殷周畿內燕
趙之間亦夙稱富國今則地成曠土人盡惰民安得不窮困而爲盜賊歲一歉
收先請緩征稍甚則加蠲貸又其甚則截漕發粟以賑之所以耗國帑者何可
算也運河屢淤東南漕未可恃設有意外何以處此臣見歷來保薦州縣必首
列勸課農桑其實盡屬虛談從無過問大吏奏報糧價有市價至四五千錢僅
報二兩內外其於收成又虛加分數相習成風但使董勸有方行之一方而收

利自然爭起相效田野皆闢水旱有資豈必盡資官帑善政乃行哉民之犯刑由於不率教其不率教由於衣食缺乏而廉恥不興其次第如此故養民爲首務也奏入仁宗嘉納之特詔飭各省以勸課農桑爲亟速清訟獄嚴懲誣枉二十年擢兵部侍郎歷戶部禮部二十二年典會試二十四年督江蘇學政道光元年江浙督撫孫玉庭等議禁漕務浮收明定八折實許其加二文田疏陳積弊曰乾隆三十年以前並無所謂浮收厥後生齒日繁物價踴貴官民交困然猶止就斛面浮取而已未幾而有折扣之舉始每石不過折耗數升繼乃至五折六折不等小民終歲勤動事畜不贍勢必與官抗官即從而制之所舉以爲民罪者三曰抗糧曰包完曰掙交醜米民間零星小戶貧苦之家拖欠勢所必有若家有數十百畝之產竟置官賦於不問實事所絕無今之所謂抗糧者如業戶應完若干石多齎一二成以備折收書吏等先以淋尖踢腳灑散多方糜耗是已不敷再以折扣計算如準作七折便須再加三四成業戶必至爭執間有原米運回州縣即指爲抗欠此其由也包完者寡弱之戶轉交有力者代爲

輸納然官吏果甚公正何庸託人可不煩言而自破民間運米進倉男婦老幼進城守待陰雨溼露猶百計保護恐米色變傷謂其特以醜米誣交殆非人情惟年歲不齊米色不能畫一亦間有之然官吏非執此三者不能相制生監暫革齊民拘禁俟其補交然後請釋不知此皆良民非莠民也此小民不能上達之實情也然州縣亦有不能不爾者自開倉訖兌運修整倉廩蘆席竹木繩索油燭百需幕丁胥役脩飯工食加以運丁需索津貼滋甚至其平日廉俸公項不能敷用無論大小公事一到即須出錢料理即如辦一徒罪之犯自初詳至結案約須百數十金案愈巨則費愈多遞解人犯運送糧鞘事事皆需費用若不取之於民謹厚者奉身而退貪婪者非向詞訟生發不可吏治更不可問彼思他弊獲咎愈重不若浮收爲上下咸知故甘受民怨而不惜其藉以自肥者固多而迫於不獲已者蓋亦不少言事者動稱不肖州縣州縣亦人耳何至一行作吏便行同苟賤此又州縣不能上達之實情也州縣受掊克之名而運丁陰受其益然亦有不能不然者昔時運道深通運丁或藉來往携貨售賣以贍

用後因黃河屢經倒灌運道受害慮其船重難行嚴禁多帶貨物又從前回空帶鹽不甚搜查近因鹽商力絀未免算及瑣屑而各丁出息遂盡加以運道日淺反多添夫撥淺之費此費不出之州縣更無所出此又運丁不能上達之實情也數年前因津貼日增於是定例只准給三百兩運丁實不濟用則重船不能開州縣必獲咎戾不免私自增給是所謂三百兩者虛名耳頃又以浮收過甚嚴禁收漕不得過八折州縣入不敷出則强者不敢與較弱者仍肆朘削是所謂八折者亦虛名耳然民間執詞抗官官必設法箝制而事端因以滋生皆出於民心之不服若將此不靖之民盡法懲處則既因浮收復陷法網民心恐愈不平若一味姑容隱忍則小民開犯上之風將致不必收漕而亦目無官長其於紀綱法度所關實爲匪細疏入下部議時在廷諸臣多以爲言文田持議切中時弊最得其平詔禁浮收裁革運丁陋規八折之議遂寢四年擢左都御史七年遷禮部尙書尋卒依尙書例賜卹諡文僖文田持己方嚴數督學政革除陋例斥僞體拔眞才典試號得士論學尊宋儒所著書則宗漢學博綜羣籍